

Polgo Si Wali Pas Timotiba Aşani

Hasia nedebo tau sabo po

Te Pol te Rom moni hanude kalabus bidibadi agai e pas te gesi pasto bidi Timoti agaba aşana tolali. Polgo koneani, te Efesus hanude te boi bidi dabe augwaligo te Kraisgo po wali pabo we bidi dabebolo mabo dene dali, seğe dali te genuai mu nosali pedalaibao. Tama agai me koneani, te Kraisgo po wali pabo we bidi hani tomode te tibo po ola mabo bage pedaluyu, tama te gasa we bidigo dwagi yai kolesaga ebo dolobo se yaibao. Tama koneyu, tama Polgo te Timoti homu hodolobo tau sabo po aşani, te Timotigo te aga te we bidi tonalubo se bugagia emainogo yai. Tama Polgo homugo te Timoti aga Romba asao, te po wali. Magi baso meni, Polgo koneani, aga digi isabo sogo paba yagasai dao.

**Te bidi Timotigo se bomu elama
ebaso, te se bidi mu nogi te God
gedude elalueibao**

(Daı 1–4)

¹ Ena Pol dao, ena Kraıs Jisasgo po sela pabo se bidi dao. God aga homugo digi ena te şeba muani. Da te Kraıs Jisas dali wadolobaso da, teda Godigo te bidibo ula dabolo mawaibao. Agai te ula mabo po mu daı walali. Tama agai ena te po we bidibolo pusigi pomainogo agai ena

tagala palai dao. ² Timoti, eno nage dali dwagi yai homu eyu godolo ebo dao, nage eno ogwa mu tiwai dao, tama eno e pas nagebolo aseana tolobao. Eno homugo God Aya dali, dago Genuai Bidi Krais Jisas dali sigo, te olo tau sabo wiegi yai kolesagago te nage homu dene eyu tau selama, tama nago homu dua nagame ilama bidimainao.

Dago te Godigo po dali hale me elamuo

³ Te eno wai dabego Godigo kolesaga wali pali, te tiwai naga gilama eno me wali pobao. Tama eno te dwai se dali dwagi yai se dali dagalabo homugo kone paluyu, eno te ebo kolesaga te dolo mu ebo homu ebao. Tama eno gedu haluasa po wabo, te eno hulide me giligade me obao, sesemane sogo te eno nage homugo koneama te Godibolo buba hwi weyu, te nage usu da po agabolo wabo dao. ⁴ Te eno nage Efesus bulude tagalali sogo te nago homu dene ebaso nago gedude ai gelali. Tama tede eno homu ebaso, tama eno homugo eno dwagi yai homu pemene yainogo eyu, eno nage suabo homu godolo mu ebao. ⁵ Eno te nago Kraisde konealubo po naga homugo dau mu wali kolesagaba homu kone palama, te nago te tibo menio. Te tobage konealubo po tiwai hasia te naga auwa mosi Loisgo me, te naga ida Yunisgo konealubo po dau wabo kolesaga me te tiwai elaluai. Tama eno mu koneani, homu si meni, te tiwai konealubo po te nagede me elalubo dao. * ⁶ Tama tibaso eno nago homu hodolabo po megii nagebolo obao. Te Godigo nagebolo te nago yabo se me, te se yabo

* 1:5: Tpi 16:1

bomo dali, homu kolesaga dali si te nagebolo olo mawai dao. Tama te nagebolo mani nai te nago homugo kone palao. Polobadu eno nogo nago toboluba mubaso tama nago te nai sai. Megi nago te sali nai ma hodolobo şe yao, te bidigo sia bogoli genuai emainu ponobo tiwai ilao. ⁷ Magi baso meni, te Godigo da te wi ebo bage bidimainu aga Mobo Bidi dabolo me mabeo. Menio. Agai Mobo Bidigo dabolo te bomu hauwa me, te dena ama dede dali dwagi yai homu eyu godolo ebo kolesaga me, te dena digi bugagia tonaluabo bomu me, te dabolo momainogo eyu, Godigo aga Mobo Bidi dabolo mani.

⁸ Tama tibaso, nago te dago Genuai Bidi Jisas da, te Godigo sa muani te we bidi tau somainogo tagala palali bidi Krai dao, te po te we bidibolo pusubo te hale me egio. Tama eno te po we bidi meba augwalibolo pusubaso, augwaligo ena kalabusiba muani. Tiali goli nago enade me hale me elamuo. Menio. Nago bomu te Godide selama, tama ena dali te Krai de wiegi yai gesi po pusubo şede şe şe tolao. ⁹ Godigo da ma dobola selama, tama da aga we bidi mu bidimainu agai da i wali. Agai te dago dwagi yai kolesaga ebaso, te homu elama tama i me wabeo. Menio. Te aga homugo digi te agai da olo mu tau sabo dwagi yai kolesaga elama tama da i wali. Polobadu mu, Godigo te tş dali dagalu dali nigisişadi, tama te Krai Jisago yabo şede koneama agai te olo mu tau sabo wiegi yai kolesaga dabolo mawai dao. ¹⁰ Tama megı e sogo Krai Jisas, te da ma sali bidi, aga te hanılama pedalalıo. Tama tedu te Godigo olo mu tau sabo wiegi yai kolesaga te

hania pedalali. Krais Jisasgo te isibo kolesagago bomo togolama, tama te agai ola mani gesi wiegi yai pogo te dwagi yai bidibo ula dali, te dolosiabo gamonabo kolesaga dali te si pedalama, tama te ulaba munama elalubao.

¹¹ Godigo te wiegi yai gesi po pusubo şeba ena mubaso, tama ena te po pusubo bidi bidiyu, tama ena te Godigo şeba tagala palali şe ebo po ola mabo tisa bidi dao. ¹² Tama tiyu, ena kalabus bidi megı bidiyu, tama te şeşe eno tolobao. Tiali goli, ena tede hale me egobeo. Menio. Ena da, te eno Godiba homu tia pai bidi da weyu, te aga eno konebaso hale egobeo. Tama eno koneani, agai ena nogoba te muani şe te agai mu tonaluyu, tama te sesemane sogo bugagia bidada peyu, te genuai bodolu pedalubo sogoba usu nigi pabo aga usu yaibao, te şe hagagobeo. ¹³ Te doloba pai tau sabo po nago eno pedauwalide odali. Te odali po te usu ni tiwai elaluyu, tama te po bugagia wali pao. Tama tiyu, nago konealubo po Krais Jisasba bomu elama daş weyu, tama aga dali wadolama, tama God dali, we bidi dali dwagi yai homu eyu godolo mu eyu bidao. ¹⁴ Nago te Godigo nageboto mani dwagi yai po te nago bugagia tonaluao. Tama Godigo Tedali Mobu Bidi te da tomode bidiyu, agai nage te şede tau saibao.

¹⁵ Timoti, nago koneani, te Esia genuai tşede bidibo Godigo po odoşo bidi augwali tigidaligo ena tagalai dao. Te augwali tomode te bidi si Figelus me Hermogenes si dali, te augwaligo me ena tagalai dao. ¹⁶ Eno homugo te Genuai Bidi Godigo te bidi Onesiforus aga we wai puluba dali homu dene eyu tau sao. Te hauwa sogo

Onesiforusgo eno homu dwagi yai bugagia ilai. Tama aga ena kalabus yalide hale me ebeo. Menio. ¹⁷ Aga te e moni hanu Romba asama, tama ena gegagasobo sê dene iduama, tama nosali agai ena sualio. ¹⁸ Te genuai po tų yabo sogode eno homugo te Genuai Bidigo Onesiforus homu dene eyu tau sao. Tama te bidi agai ena te Efesus bulude hauwa sogo tau sali, te naga digi bugagia naga koneai dao.

2

Nage te Krai Jisasgo wiegi yai ami bidi bidao

¹ Timoti, eno ogwa, naga digi sesemane sogo nago te Krai Jisasgo olo mu tau sabo dwagi yai kolesagago te nage bomomomai. ² Tama tiyu, te nago eno pedauwalide odali po, te po te bidi hauwa gedude pusali po tigidali nago odali. Tama te po naga nago te Godigo poba homu kęa pai bidi dabe, augwaligo nogoba te po bugagia muao, te augwaligo me usu elama tama te po gasa Godigo poba homu kęa pai bidi dabebolo nosali ola momainu yao.

³ Da Godigo po odobo we bidi te da te ami bidi hani tiwai dao, tama Krai Jisas aga da te dago tuni bidi dao. Nage te agai dwagi yai sê ebo ami bidi bididu, tama da gasa ami sê ebo bidi dabe dali hodobo te sęę dali dene tolobo sę yao. ⁴ Te ami sę eyu bidibo bidigo agai te gasa haniani sę dali eyu me egobeo. Menio. Te aga tonalubo genuai ami bidigo agai ebo sêde dwagi yai homu emainu eyu, agai te ami bidigo sę naga ebo dao. ⁵ Te bidi geainu udabo bidi, agai te

udabo bomai po bugagia dolo wali pao. Ma te meni eyu da, teda agai te udabo bidigo ugaba ela holobo nogi sabo namba me sogobeo. ⁶ Te se dene elama gi bulama tonalubo bidi da, aga te gasa bidi dabego te gide nai polasa sisabadi te polasa nai sabo bidi dao. ⁷ Timoti, nago eno te wali po digi po begelali po sela homude kone palao. Te Genuai Bidigo nage homu ula ilibaso, tama te po page tigidali nago koneaibao.

⁸ Sesemane sogo nago te Jisas Kraiss homugo koneao. Aga te isama, te isali bidi bidibo digidu ma hodaluali. Aga te polobadu tuni bidi Devitgo hani bidi bidai. Te eno te Godigo gesi dwagi yai po wabo si, te Kraiss aga te bidi Devitgo bulai wai dao, te po me eno pusubo dao. ⁹ Eno te gesi dwagi yai po pusubaso, tama tede naga te bidi augwaligo ena te gavmango bomu yai po bolali dwai bidi da homu elama, tama augwaligo haniani sege enabolo mani. Awe, augwaligo ena kalabusiba me muani. Tiali goli te Godigo po da, augwaligo te kalabusiba me mugobeo, te usu egobeo. ¹⁰ Tama tibaso, eno ena homu dau walama, tama eno te sege tigidali tolobode bomu elama dolalubo dao. Eno te Godigo aga sa muani we bidi tau sainu ebo dao. Eno homugo te Kraiss Jisasgo yali sego te Godigo augwali ma dobola selama, tama dagalude bugagia mu bidada peyu, bidada pomainu ebo dao. ¹¹ E po eno megii obao te mu po dao, tama bidigo aga homu teba tialubaso, te aga tulalugobeo:

“Te mu tama, da Kraiss dali wadolama tama aga dali
isali tiwai yaligo da, teda da me aga dali bidibo

ulade bidaibao.

¹² Te da tigidali seğe tolobode bomu elama
dolaluali

da, teda da aga dali tuni bidi me bidaibao.

Te dago aga tudiba mubaso da, teda agai me da
tudiba muaibao. *

¹³ Te dago te Kraisha homu begi pabo kolesaga
tagaliyu da, teda agai aga doloba pai kolesaga
tagalogobeo.

Agai te aga doloba pai kolesaga te munu me
hasegelegobeo. Mu menio.”

*Te se bidi mu nogi te Godigo gedude elaluain-
ogo eyu, te bidi Timotigo se bomu elama yao wali*

¹⁴ Sesemane sogo nago te nago tonalubo we
bidi augwali homu te eno megi wali pogo
hodolao. Tama God gedude nago augwalibolo
te haniani olo pode konila po olamuo po bomu
elama wao. Te olo pode konila po wabo kole-
sagago te bidi me deli tau sabo usu me egobeo.
Menio. Te tobage po odobo bidi dabe te doloyu
naga ebo dao. ¹⁵ Tialima, te genuai pabo tu

bugagia dolo mu nigibo bidi tiwai gilama eyu,
tama nago te Godigo mu po dolo augwalibolo
ola mao. Tama tiyu, nago naga seđe hale idali
weyu, te Godigo nago ebo seđe “Te usu mu dao,”
omainogo eyu, tama nago bomu elama, nago se
bugagia yao. ¹⁶ Te kedu meni yai olo po, te

Godigo kolesaga wali pişabo olo po, te tobage
po wabo nago ela soao, augwali dali po migio.
Te tobage po mibogo te bidi dabego te Godigo
kolesaga tagalabo kolesaga genuai ilibo dao. ¹⁷ Te

* **2:12:** Mat 10:33; Luk 12:9

tobage olo po ola mabo bagego po te dwai keni tiwai elama, tama te genuai mu pedaliyu, tama tigi mi tudu pabo keni tiwai yaibao. Te tobage po ola mabo bidi si te Himeneus de Filetus si dao. ¹⁸ Te bidi si augwaligo te Godigo mu pode geda munama tama tagalali. Tama tiyu, augwaligo te we bidibolo te po ola mabo dao, “Da ma hodalaoi dao, tama da isibo si dago tigi nosali ma hodalogobeo.” Te pogo augwaligo te we bidi mebage Kraisde dau wali konealubo po dolobo dao. ¹⁹ Tiali goli Godigo mu po te bidigo dolobo usu egobeo. Te bomai be tuni ni pos tiwai bulalio, tama te dolalubao, te be peme egobeo. Tama te tuni ni posde hagea siyu aseani po te tiwai elalubao, “Genuai Bidigo aga we bidi digi bugagia koneani.” Tama te po me aseani elalubo, “Te Genuai Bidi nogi nogi eyu ‘Ena aga bidi dao’ po wabo tigidali bidi, augwaligo te dolo isiawai kolesaga tudiba muao,” te po aseani elalubao.

²⁰ Te doado bage hauwa elalubo bidigo bede te haniani plet pou elalubo dao. Te plet pou meba augwaligo te wiegi yai kapa si gol me silva, te sigo nigali. Tama te nogi elalubo sogo augwaligo nai tuenu augwaligo te wiegi yai nai naga te tobage wiegi yai pou dabeba mubo dao. Te pou dabe te gasagi yai tedali dao. Tama plet pou meba augwaligo nigo nigali me, tama meba augwaligo te mama togo nigali me elalubao. Te tobage olo pougo te olo se naga elalubao. ²¹ Tama bidi dabe augwali te pou dabe tiwai dao. Bidi me deligo te olo po ola mabo bage tagalama, tama aga te meda meni yai bidali da, teda aga te dwagi yai se mu ebo pou tiwai bidiyu, te aga

tedali gasagi yai şe ebo bidi bidaibao. Magi baso meni, aga magi şe me isawai bugagia bidibasosagai aga Genuai Bidigo şe ebo usu eyu, tama we bidi tau sabo haniani dwagi yai şe tigidali yabo sisi ilaibao. ²² Nage gesi bidi dao. Te gesi bidigo dwai şe godolo ebo homu kolesaga nageba pedalubo si, te sesemane sogo nage te kolesaga suyu sali siyu wi pao. Tama tiyu nago te doloba pai kolesaga me, te homu mu ebo kolesaga me, te we bidi dali dwagi yai homu eyu godolo mu ebo kolesaga me, te homu nagame eyu we bidi dali bugagia bidibo kolesaga me, te kolesaga tigidali nago pobasa pao. We bidi meba augwali te meda meni yai homu kolesaga elalu tama te Genuai Bidigo nogi nogi eyu, “Da aga we bidi dao,” te po wabo bage dao. Tama nago augwali dali wadoloyu, tama dagego te eno megi tama nogi yali wiegi yai kolesaga pobasa pao. ²³ Tama te kedu meni yai olo pode konila po wabo te nago tudiba muao. Nago koneani, te tobage pogo te konila po wabo homu hodolobo po page elalubao, tama tede te şeşę ebo kolesaga pedalobo dao. ²⁴ Tiali goli te Genuai Bidigo şe ebo bidigo te munu me pogo hwınamuo. Menio. Agai te tigidali we bidi dali abagi homu eyu dua digi yao. Aga te Godigo po ola mabo şede usu eyu wiegi yai tisa bidi bidiyu, tama şeşę polo eyu polo wei ponosiabo bidi bidao. ²⁵ Te agai ola mabo po sela şabo bidi dabe dali agai te nagamea pai homu naga eyu, augwaligo homu dodolao. Te agai tama tiyu da, teda Godigo augwali tau siyu, tama augwali homu hasegeleyu tama te mu po bugagia koneabo tų elaluaibao.

²⁶ Polobadu te Satango agai hagani togobo wago augwali sali, te augwaligo agai po wali pomainu yali. Tiali goli augwaligo te mu po koneyu da, teda augwaligo homu hania ma ula eyu, tama augwaligo te Satango hagani togobo wa wi pabo usu yaibao.

3

Te ṭo de dagalu si silibo sogo te bidi dabe augwaligo dwai kolesaga hauwa pedalaibao

¹ Timoti, nago te tiwai tama koneao: te ṭo de dagalu si silibo sogo te p̄aba yagasobo si te dwai s̄e ebo bidi dabe augwaligo dwai s̄e hauwa ebaso, te Godigo po odobo we bidiba te dwai s̄ego kekainu sinabo sogo pedelaibao.

² Te bidi dabe augwa digi te augwa naga godolo elama, tama augwaligo te mone ge godolo mu yaibao. Te augwa digi augwa nogi ugwaba siyu, tama subigila hagoma eyu, tama posobo po waibao. Te meba augwaligo aya idago po sela s̄awaibao. Te augwaligo buba hwi po te Godibolo me, te gasa we bidibolo me wagobeo. Augwaligo Godigo kolesaga tudiba muaibao. ³ Te augwa deli kanemedede ame nani ama dede dabe dali digi te deliba wasia sogobeo. Gasa bidigo augwali dali yali dwai s̄e te augwaligo sela s̄abo homu munu me egobeo, te homu dene me egobeo. Te geme dualama posobo po subigila waibao. Te meba augwaligo augwa tigigo homu me tonalugobeo. Te augwali s̄eḅe eyu subigila bidi dabe dolaibao. Tama augwaligo te tigidali dwagi yai kolesaga dali boi bidi nigaibao. ⁴ Te augwaligo augwa

abagi dabe te boi bidi nogoba muaibao. Te augwaligo augwa ebo kolesaga osola susuayu tama bomo elama, tama augwa homu naga polo wali paibao. Te augwa homugo digi te augwali genuai bidi da homu yaibao. Te augwaligo te tigigo te haniani godolo ebo homude te wiegi yai homu pemene eyu, tama augwaligo God godolo homu me egobeo. ⁵ Te augwaligo te Godigo po odobo we bidi mu tiwai me sogo bilaibao. Tiali goli augwa homu ugwadu daidu naga tama tiyu, tama Godigo augwaligo kolesaga hasegelabo bomu te augwa tudiba mubo dao. Te tama kolesaga ebo bidi dabe augwalide te nage ibaba kisa selama bidamuo. ⁶ Te tama tobage bidi dabe meba te augwali dua digi biliyu, tama te wiegi yai homu kolesaga meni yai we dabego be tomoba pelama, tama augwaligo augwali homu te kalabus ilibo dao. Te tobage we dabe augwali te dwai şe hauwa elalu, te augwali homude şeş elalubao. Tama augwaligo homu te haniani naide hodolama, tama augwa homu subigila hogwaiabo homu eyu, tama tebogo augwali te haniani kolesagaba kegebo dao. ⁷ Te we dabe augwaligo sesemane sogo augwaligo te ola mabo po odobo şe ebadi, tiali goli augwaligo te Godigo mu po page koneainu ebo usu egobeo. ⁸ Polobadu Janes de Jambres te bidi sigo Moses dali boi bidi yali, tama tiwai yali gilama te megı elalubo bidi dabe augwaligo me te Godigo mu po dali boi bidi ebo dao. Te augwaligo homu kolesaga te dolalio, tama augwaligo Kraisde konealubo po daş wali te tibo naga ebaso, Godigo augwali buluba şawai dao.

* 9 Tiali goli augwaligo te Godigo mu po dali boi bidi ebo kolesaga te we bidi tomode genuai mu me pedalugobeo. Menio. Te tigidali bidigo augwaligo kolesaga te esela pabo bidi dabego ebo kolesaga tiwai ebo sueibao, te tiwai te polobadu te bidi dabego te bidi Janes de Jambres sigo te esela pabo bidigo ebo kolesaga suali tiwai gilama yaibao.

Nago Godigo po dą ola sao

10 Te gasa bidi dabe augwaligo te tobage dwai sę eyu bidaibao. Tiali goli nage da, nage ena dali biliyu, tama eno te we bidi dabebolo ola mani po te nago koneai. Tama eno kolesaga page tigidali te me nago koneai. Ena e tǝde bidibo sogo eno bomo elama, tama Godigo sę yabo homu ebo me te nago koneai. Nago ena me koneani, eno konealubo po Godiba dą olama, tama sesemane sogo eno te gasa we bidi dali sębę polo ebeo, te eno sę augwali dali dua yali dao. Eno augwali dali dwagi yai homu eyu, godolo mu ebo kolesaga eyu, tama augwaligo enabolo mani sęę menama, tama eno bomo elama bididu te sęę eno bugagia tolobo dao, te me nago koneai. Eno ebo kolesaga tigidali nago koneama, nago wali pabo dao. 11 Te bidi dabego dwai kolesaga ena dali ebo tigidali te nago koneani, tama tigidali dene ena te bulu Antiokde me, Aikoniamde me, te Listrade me sai. Te tigidali sęę augwaligo enabolo menama tama eno te sęę tolobo nago koneanio. Tiali goli Genuai Bidigo ena tau siyu, tama te sęę tigidali

* 3:8: Sai 7:11

agai sila palali. * ¹² Te mu po dao, tigidali bidi te Krai Jisas dali keş selama, tama Godigo kolesaga wali pabo bidi, teda te boi bidi dabego dwai se eyu, seşe augwalibolo me mawaibao. ¹³ Tiali goli te dwai bidi dabego me, te tibo po ola mabo bidi dabego me, te bidi dabe augwaligo ebo dwai se dwasianu gagalama tama genuai pedalaibao. Tama tiyu, augwaligo te tibo po te gasa we bidibolo ola mobadi, te Satango me augwali tibo po ola maduaibao. Tama augwaligo kolesaga te dwai mu pedalaibao. ¹⁴ Tiali goli, Timoti, nago da, nago te Godigo mu po odama tama bomo elama nago “Te po mu po dao,” te homu te pode yali dao. Tama megi nago te kolesaga me eyu bididua. Dago nage te mu po ola mani we bidi nago da bugagia konebo dao. ¹⁵ Tama e me nago koneani, polobadu nage te dwasianu wai bq elalubadi tama nago te tedali gasagi yai wiegi yai bukude po konebo se gagalama sai. Te tedali bukude pogo te dwagi yai homu kolesaga nagebolo mabo usu yali. Tama nago te dwagi yai homu kolesagago eyu, tama konealubo po Krai Jisasba daş obaso da, teda Godigo nage ma saibao. ¹⁶ Te Godigo Mobo Bidigo digi te tigidali wiegi yai po bukude aşani bidi dabe tau selama, tama augwaligo te po te bukude aşai dao. Tama te dwagi yai kolesaga dabolo ola mabo se me, tama dena dwai se denabolo ola mabo se me, tama da bilibo kolesaga ma dodolobo se me, tama dabolo te doloba pai kolesaga ola mabo se me, te se tigidali ebode te Godigo bukude aşani

* **3:11:** Tpi 13:14-52; 14:1-7, 8-20

po usu dao. ¹⁷ Tama tibaso, da Godigo şe ebo bidi tigidali dago te bukude aşani pode te şe yabo bomu dali, te homu kolesaga dali si selama, tama dago tigidali haniani dwagi yai şe yabo usu elama sisi ilimainu ebo dao.

4

Nago Godigo po mu pusao

¹⁻² Timoti, te God de Krai Jisas si gedude eno nagebolo e moni şeşe yai po bomu elama wainogo ebao. Krai Jisas ağı te tigidali we bidi, te bidibo ula elalubo bidi badi, te isali bidi dabe dali me po tų eyu dagalaibao. Te aga tőba ma asiyu, tama tigidali bidi geduba pedalama, tama tuni bidi mu bidaibao. Tama tibaso, eno e şeşe yai po bomu elama nagebolo obao, nago Godigo po mu pusao. Tama te po odainu sisi elalubo bidi dabe ebaso, ma augwali sisi elalusiaşbaso me, te homu eyu tagalao, te sesemane sogo nago te Kraigo po bomu elama pusubo şe yao. Nago te augwali homuba te po eniyu, te augwali homu begelemainu te augwali hodolao. Augwaligo dwai şe ebaso, tama nago te pogo te dwai şe tagalabo po augwalibolo pusao. Nago te augwaligo Godigo kolesaga wali pomainu homu hodolao. Tama te tobage haniani şe eyu, sesemane sogo nago augwalide şe dua digi eyu, şeşe polo isayü tama augwali bugagia ola mao. ³ Magi baso meni, nosali te gasa sogo pedalaibao. Tama te sogo te bidi dabego Godigo mu po ola mabo odobo hagela yaibao. Odogobeo. Menio. Te augwa digi augwa homu kolesaga naga wali peyu, tama augwaligo te po ola mabo

tisa bidi hauwa saibao. Augwaligo godolo ebo po odomainogo te bage saibao. Tama te po ola mabo bidi dabe augwaligo te augwali sali we bidi dabebolo Godigo po pusugobeo. Menio. Augwaligo te we bidigo godolo ebo po naga pusaibao. Te we bidi augwaligo olo te dini ebaso, te tibo po ola mabo bidi dabego te augwaligo olo te pogo kieibao. ⁴ Tama te we bidi augwaligo te mu po odobo tagaliyu, te tudiba munama, tama te haniani olo namu po waboba olo munama odaibao. ⁵ Tiali goli naga digi te polobo bidi tiwai bidisiayu naga homu sesemane sogo bugagia tonaludao. Tama tiyu nago te şeşe tolao. Nago te bidi dabe augwalibolo te Godigo gesi dwagi yai po pusubo şe yao. Nago te we bidi dabe augwali tau sabo haniani şe elalubaso, te şe nago bugagia mu yao.

⁶ Magi baso meni, te ena isama pabo sogo paşa yagasalio. Nago koneani, te polobadu te bidi dabe augwaligo te wain aî gelama te Godibolo ofa mabo, te tiwai naga te eno kaneme gelabo sogo paşa yagasali. ⁷ Te Kraisde konealubo po daş wabo bidi te usu si yainogo udabo tiwai şe elalubao. Te usu si yainu ena bugagia udawai dao. Megi da te daş ilaliba ena mu sabolalio. Eno Kraisde konealubo po homugo daş mu wai dao, te eno munu me tagalobeo. ⁸ Megi da te udabo daş ilaliba pedalali bidigo genuai nogi yai namba te sisi elama ena tonalubao. Te genuai nogi sabo namba te tiwai yaibao: te Genuai Bidigo ena te doloba pai bidi nogi poaibao. Genuai Bidi aga te doloba pai po tu ebo bidi jas, tama te genuai sogo pedalubode agai te doloba pai bidi nogi enabolo

mawaibao. Tama agai enaduba delibolo naga te me magobeo. Menio. Te aga hania pedalubo suainu godolo homu ebo bidi dabe tigidalibolo te doloba pai bidi nogi mawaibao.

Po silagasu wabo po

⁹ Nage asesə tama nage ena bidibo madi polo asao. ¹⁰ Te bidi Demas agai ena taga palio. Agai te megi tɔde elalubo kolesaga godolo mu elama, tama agai ena tagalama te Tesalonaika hanuba pai. Te Kresens aga te Galesia tɔba pobadi yali, tama te bidi Taitus me te Dalmesia tɔba pai dao.

* ¹¹ Luk deli naga ena dali bidibao. Nago te Mak selama, tama odasa nage dali asao. Agai te bugagia te sɛde ena tau somainu usu yaibao.

* ¹² Eno te bidi Tikikus te Efesus hanuba tagala palai dao. ¹³ Nage enaba asobadi tama nago te eno kedau sogo gudubo bobage ugwa sela asao. Te ugwa eno te Troas hanude tagalali, te bidi Karpus aga bedede munalubao. Tama tede muani buku dabe me sao. Tama bugagia dua mu nago te eno sipsip wali dabego nigali te buku dabe sabo te homu munu me gegeda peyu tagalamu dao. *

¹⁴ Te bidi nogi Aleksander, agai mone ge sabo sɛ da te haniani nai te aga kapago nigibo bidi, te bidi agai enabolo dwai sɛ mu ilali. Nosali te Genuai Bidigo agabolo te dwai dene wei ponoyu, te aga yali dwai kolesaga usu nama te dene mawaibao. *

¹⁵ Nage me nage te bidi

* **4:10:** 2 Ko 8:23; Gal 4:23; Kol 4:14; Tai 1:4; Flm 24 * **4:11:** Tpi 12:12, 25; 13:13; 15:37-39; Kol 4:10, 14; Flm 24 * **4:13:** Tpi 20:6 * **4:14:** Tib 62:12; Rom 2:6

Aleksanderde dua dao, bugagia tonaluao. Agai bomo mu elama, tama te dago ola mabo po mu aiyaba elaluainu eyu, tede boi bidi homu yai dao.

¹⁶ Te ena ede Rom hanude bidiyu, tama te hasia sogo eno te po tude te po wei ponani sogo te bidi me deli ena tau sabo po me wagasobeo. Menio. Tigidali bidi augwaligo ena tagalali. Eno homugo te augwaligo te dwai se te Godigo homu kone me elamuo, wei ponamuo. ¹⁷ Tiali goli Genuai Bidi aga ena dali bidaluyu, tama enabolo bomoman. Eno te Godigo po sese pusubo te usu mu emainu, tama te agai po odisawai hani tigidali augwaligo odomainogo eyu, agai bomoman enabolo mani. Tama augwali te bidi ela tubo dwai hasa laion tiwai bidiyu, tama augwaligo ena ela muidali weyu Godigo ena tau selama dwagi yai madiba muanio. ¹⁸ Te augwaligo dwai kolesaga tigidali ena dali yainu ebo, tede te Genuai Bidigo ena tau selama, tama agai ena ma sai hagede eyu, tama ena oda selama, te aga bomoman elalubo bulu te dagaluba sese muaibao, aga we bidi tonalubo se ebo madiba. Te genuai nogi me bomoman te agade sesemane sogo mu bidada peyu, bidada pomainao. Mu dao.

¹⁹ Nago eno te siade da wali po te we Prisila dali, aga bidi Akwila si dali me, te Onesiforus me te aga we wai puluba augwalibolo te po wao. *

²⁰ Te bidi Erastus te Korin hanude me bidibao. Tama Trofimius te gasi elalubaso, tama eno aga te Miletus hanude tagalama bidibao. ²¹ Nage asesa polo asiyu, tama te kedau eyu dwai wali asobo sogo asisabadi nage eba polo sabolao.

* 4:19: Tpi 18:2

Te bidi dabe Yubulus me, te Pudens badi, te Linus me, te we nogi Klodia me, augwaligo te siade dao po nagebolo ola tolobao. Te gasa ede bidibo ama dede dabe tigidaligo me te po ola tolobao.

²² Eno homugo te dago Genuai Bidi te nage dali bidao. Te agai olo mu tau sabo wiegi yai kolesaga te dage dali bidao. Te tama dao.

Godigo dwagi yai po buku
The Holy Bible in the Dadibi Language of Papua New
Guinea
Buk Baibel long tok ples Dadibi long Niugini

copyright © 1987, 2001 Wycliffe Bible Translators, Inc.

Language: Dadibi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-22

PDF generated using Haiola and XeLaTeX on 11 Nov 2022 from source files dated 9 Oct 2020

f3fb5335-7c77-5120-883d-cc05478d7362